

O LE SULU SAMOA



EKALEZIA FAAPOTOPOTOGA KERISIANO SAMOA
O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839 O LE SULU SAMOA IULAI 2022

email: sulusamoa@cccs.org.ws - Main Office: Ph. 24414, Ext 30 - website: www.cccs.org.ws



Valaauina Taumua FS, Iosefa A. Uilelea FT (Taitaifono Fono Tele), Ioane Viliamu Samoa FT, Tunumoso S. Iosia FT, (Sui Taitaifono Fono Tele), Silipa Silipa FS, Sotiaka Roma FS.



Maota o le Galuega - EFKS Salelologa Hall

FAASINO UPU

1. O LE LAUGA	2
2. MAA FAAMANATU FALE LOMITUSI	3
3. EFKS SALELOLOGA HALL	4
4. OSIGA FEAGAIGA EFKS TULAELE	5
5. ULUAI MALAGA TAITAFONO	5
6. AU TAUMAFAI IA IULAI	6
7. TATALA FINAUGA AUTALAVOU	7
8. O LE PEROFETA MULIMULI	8
9. NA O AFIGA E TULEI MAI FOFOGA	11
10. PEPA MAFUTAGA MTG FALEATA	13
11. O E UA FAI I LAGI FOLAUGA	15
12. ATA O NISI MATAUPU TUSIA	16

O LE LAUGA

TUSI FAITAU: IOPU 42: 12 - 15; II KORINITO 12: 1 - 10

MATUA: II KORINITO 12: 9, “O lo’u nei alofa tunoa e lava lea e fesoasoani ia te oe; auā o le vaivai e fa’aotoaina ai lo’u mana”

AUTU: MALOSI I TOTONU O LE VĀIVĀI

O le mea moni, e lē o aso uma e taugalemū ai. Ua lē o taimi uma foi e sologa lelei ai. O le aso ua to’a, o le aso foi ua louā. O le aso e fiafia ai, ma le aso e faanoanoa ai. O taimi e ‘ata ai, ma ituaso e tagi ai. Auā na fetalai lava le Alii i le Ioane 16:33 “E maua outou i puapuaga i le lalolagi....” A o le mana o le Alii na lagona e Paulo ina ua fetalai le Alii ia te ia, “O lo’u nei alofa tunoa e lava lea e fesoasoani ia te oe; auā o le vaivai e fa’aotoaina ai lo’u mana.”

Ioe, e le’i ‘alo faafitauli ma puapuagā o le olaga i le aposetolo. Sa matuā iloga ona lailai ai Paulo. O lana tusi lenei na ia tala ai i le Ekalesia i Korinito le faasauāina o ia ona o Iesu ma Lana Tala Lelei. A tautalagia lona tulaga fa’aaposetolo, ua sili ia i le sasaina ma faafalepuipui soo. Ua faatolu ona afatia i le sami. Na po ma ao o faaopeopea i le vasa. Na maalili, fia ‘ai, pupula faasoloatoa i le ao ma le po. Sa fetogia i maa! Na agateleina ma inosia e lutaia. Semanū a leaga i tagata o nuu ese ma ona lava uso a tagata. Na sauāina i le aai, fesēa’i i le vao. Na loka i filifili uamea. E atu tolu ona sasaina i laau. Ae faa lima ona sasa e lutaia i ta e ta’i fasefulu ma le iva! Ua atu lasi i oti.

Na aafia foi lona tagata i se gasegase tūgā lea e ta’u e Paulo pei o se mea matuitui i le tino, o le agelu o Satani ua tuia ai lona tagata. Fa’atolu ona tatalo Paulo i le Alii e aveesea lenei mea tiga mai ia te ia. A o le a le tali a le Alii? “O lo’u nei alofa tunoa e lava lea e fesoasoani ia te oe; auā o le vaivai e fa’aotoaina ai lo’u mana” O le mana o Keriso, o le mana fai vavega. O le mana faaola. O le mana sa i ai lava i le amataga faatasi ma Ia.

O le mafuaaga lea o le mitamita a Paulo i ona tigā. Auā ua ia mautinoa e i’u ia Keriso ona tigā. O le alofa tunoa o le Atua, o le malosī fou lea. O le mana lea tatou te lagonaina ai le suamalie o tigā uma ua ogotia ai i tatou. Na te faasa’olotoina i tatou mai fitā ma faigata o le ola nei. Tatou te lē ola faafifilēmu.

E faapea uiga o lo tatou ola aumau i le lalolagi nei. E faatupu e le Atua le faigatā i nisi foi taimi o lo tatou ola ina seia o tatou molimauina ai lona alofa laveai. Tatou te talitonuina ai Lona auai mai ma Lona mafutaina pea o i tatou ina ia noga ia te ia o tatou mafatiaga. O Iesu Keriso, o le alofa tunoa ia o le Atua.

E lē mafai e se puapuagā po o se tigā e oo lava i le oti ona faatoilaloina le alofa tunoa o le Atua. Auā o Ia o le atoaga o lo tatou vaivai. O le atoaga o tatou faafitauli, o lo tatou oge, o lo tatou mativa, o lo tatou gaogao, o le faanoanoa. Fai mai Paulo. “A ua tatou manumalo aiai i nei mea uma lava, ona o ia ua ia alofa mai ia te i tatou”. (Rom.8:37)

E te lē amoina foi na o oe mamafa o le lalolagi. O Keriso o le atoaga o mea uma. E atoatoa ia te Ia lo tatou saolotoga. E lava ia te Ia ou mafatiaga. ‘Aua le popolevale! ‘Aua le masalosalo. O Ia Iesu, “Aua le atuatuvaale o outou loto; ia outou faatuatua i le Atua, ia faatuatua mai foi ia te a’u”(Ioane.14:01).

O le faatuatua lea o loo naunau i ai lo tatou Faaola tatou te maua, o le talitonu ma le talia Iesu Keriso i o tatou loto i itu aso e vevesi ai. Aso e lē mautonu ai. Aso e fetosoa’ina ai e le faanoanoa ma le fefe vale. Aso ua gase ai ma ua vaivai. Ua siilima ai ua lē mafaia se mea.

O ai la e taufaamata’u mai ia te i tatou? O le vao? O le sami? O le fatu aiga po o le tausī aiga? O le aiga poo le galuega? O faalavelave eseese? O a tatou

pili ma aitalafu, po o le tau o le soifuaga? A e faapefea le ma'i? Faapefea le oti? Le Ekalesia e, ua i ai ea se mea ua faigata i le Atua? Manatua le tala ia Iopu? Le tele o puapuaga na aafia ai lea tamā, ae vaai i le mana o le Atua ma faamanuiaga na toe maua e Iopu. Aisea? Auā na faalagolago i le alofa tunoa o le Alii.

Le Ekalesia e, tatou te lē 'alofia puapuaga ma faigata e oo lava i le oti. A ia outou lototetele ma tatou faatuatua i le Atua ma lona Alo. Auā fai mai Paulo, *“Ua ou mautinoa, e lē mafaia e le oti, po o le ola, po o agelu, po o alii, po o ē malolosi, po o mea i nei ona po, po o mea atalī, po o le maualuga po o le loloto, po o se tasi mea na faia, e lē mafaia e ia mea ona faateaseina mai i tatou i le alofa o le Atua, o loo ia Keriso Iesu lo tatou Alii.”*

Ia manatua, e uma timuga, mu mai le la. E te'a matagi, to maninoa. E lutia i Puava, ae mapu i Fagalele. *“Auā o lo'u nei alofa tunoa e lava lea e fesoasoani ia te oe; o le vaivai e fa'aatoaina ai lo'u mana.”*

Ona o Iesu. Amene.

*Rev. Vaegaau Liko F.S.
EFKS Upper Hutt, Pulega Ueligitone i Saute
Matagaluega LAUMUA O AOTEAROA*

MA'A FAAMANATU O LE ULUA'I FALE LOMITUSI I MATANOFO, FALELATAI

O le Aso Toona'i 16 Iulai 2022 na faapa'iaina ai le Maa Faamanatu o le Ulua'i Fale Lomitusi o le LMS, i Matanofo i le EFKS Matautu Falelatai, Aana. O le masiofo a le Ao mamalu o le Malo, afioga Leinafo Faamausili Tuimalealiifano na ia ooti le lipine e tatala aloaia ai le Maa Faamanatu, a o le toeaina o le Pulega Lefaga ma Faleseela, susuga Nomeneta Simanu FT na ia ta'ita'i le sauniga lotu e faapa'ia ai. O le sauniga na molimauina e le mamalu o le Laulau a le Fono Tele ma le Laulau a Fono a le Komiti Au Toeaina, o Toeaina ma Faifeau o le Pulega Falelatai ma Samatau. Sa auai foi le mamalu faalemalo, le Ao mamalu o le Malo Samoa o le susuga foi i le A'oa'o Fesoasoani o le Aulotu i Matautu, faapea le Sui Palemia ma nisi o le Kapeneta ma o latou faletua.

O le talaaga o le galuega na saunia e le susuga Rimoni Wright FS, le faafeagaiga a le Ekalesia, faaopoopo foi le sui o le Aulotu le afioga Lupematasila Nanai Faamanu Ivara. O loo faamauiina i le Api o le Galuega e faapea, o le 1830 na taunuu ai le Tala Lelei i Mataniu Feagai ma le Ata na talia e Malietoa Vainuupo. 1832 na malaga ai Tuimalealiifano Sualauvi (o le tama a Tofa le tuafafine o Malietoa) i Sapapalii, ma auina mai ai e Ioane Viliamu le faifeau o Tiare e faatu le Lotu i Matanofo Falelatai, o le ulua'i lotu i Upolu, Manono ma Apolima. O le masina o Me 1839 na faatuina ai le uluai Fale Lomitusi i se vaega o le fanua i Matanofo, e pei ona sa tofia mai ai le faifeau o Misi Tea ma galulue faatasi ai ma le afioga ia Tuimalealiifano (Ia silafia o le tausaga foi lea 1839 na lomina ai le ulua'i Sulu Samoa).

O le faia o se Maa Faamanatu mo lea Ulua'i Fale Lomitusi i Samoa (o le lona lua i le Vasa Pasefika), na laga'ia e le susuga Tautiaga Senara FT, le faafeagaiga talu ai ua Penisione, sa avea ma Taitaifono o le Fono Tele, faatasi ma lana afioga i le Tuimalealiifano ma nisi. O le Fono Tele 2014 na taliaina ai le mau a le Aulotu ala atu i le Matagaluega Aana, ina ia faatupe e le EFKS le faia o se Maa Faamanatu o le ulua'i Fale Lomitusi a le LMS/EFKS. E \$71,000 le tupe na faataga mai e le Ekalesia Aoa, faaopoopo i ai le \$13,000 o le sao o le EFKS Matautu Falelatai, maua ai le aofai e \$84,000 o le tau aofa'i o le galuega na faia - aofai ai le Faalaugatasi ma teu le fanua o tu ai le Maa, o le tau o le Matuaofaiva, le Tusiata ma le Komiti galulue. E ui ina sa feagai ma le Faama'i Koviti-19, ma le taugata o oloa ona o aafiaga o le tamaoiga o le atunuu, a o leni ua tau lau o le faamoemoe i le alofa o le Atua, ma le fesoasoani malosi o ana tama fanau. Ua i ai le fuafuaga pe a tusa ma le pule faasoifua a le Atua aulia i le manuia, ona faia lea o le Lotu Faamanatu i le aso 21 Tesema 2022, e faamanatu ai le 1,900 tausaga o le Lotu i Matautu Falelatai.

O le susuga Iosefa Atapana Uilelea FT, le Taitaifono Fono Tele na saunua e momoli le agaga faamalo ma faafetai o le Ekalesia mo leni galuega, o le taeao fou mo le Ekalesia ma lona tala faasolopito. Na ia molioo faamanuiaga ia to mai Lagī, faatasi ma le meaalofa \$5,000 a le Ekalesia Aoa. Na mae'a taulumaga aloaia i Matanofo, ona taliu ane ai lea i le Maota o le Galuega i Matautu, mo le talisuga fiafia ma fa'aaloaloga maualuluga e masani ai le EFKS i aso tetele faapenei. Malo le galulue mo le Atua ma le Tala Lelei ia Iesu Keriso.

FAAPA'IA LE MAOTA O LE GALUEGA, EFKS SALELOLOGA HALL

O le Aso Faraile 15 Iulai 2022 na faapa'iaina ai le Maota o le Galuega o le EFKS Foua Salelologa, ua faaigoaina o le EFKS Salelologa Hall. O le faletua o le Taitaifono Fono Tele, afioga ia Tekimatang I. Uilelea na ia ooti le lipine e tatalaina aloaia ai lenei galuega tele ma le matagofie. Ona tãpã lea o le afioga i le Matuaofaiva, le tofa Laulua Ami Mika TK (o le tiakono o le Aulotu), mo ki e tatalaina ai le faitotoa autũ, ma ulufale atu ai le mamalu o le faapotopotoga mo le sauniga. O le Toeaina o le Pulega Safotulafai, susuga Viliamu Samoa FT na ia ta'ita'i le sauniga ma o ia foi na saunia le Lauga, a o le Tusi Paia na faitauina e le susuga Silipa Silipa FS (EFKS Fusi, Safotulafai), Mataio 22:34-40, o le Tusi Faitau Aso. O talosaga na saunia e le susuga Sotiaka Roma FS (EFKS Lalomalava), aofia ai le tatalo mo le faapa'iaina o le galuega.

O le tala o le galuega na saunia lava e le susuga Valaauina F. Taumua FS, le faafeagaiga taulagi a Ti'a ma Luamanuvae ma Tinousi, le susũ o Su'a ma le Malelega a le Malietoa, o puipui e le Falefia ma le Falesalafai, e tausi vaatele e le Lologapule ma le Faitoaga, e Laveimanino e Lavei'a'ava. *"Le Atua e, ua ia te oe le viiga e faia ma le faalologo i Siona; e avatua lava ia te oe le mea na tauto ai, le faafofoga tatalo e, e o atu ia te oe tagata uma lava."* O le tausaga 2018 na amata ai ona laga finagalo o le Aulotu ina ia toe faalelei le Maota o le Galuega. E uma le tausaga sa le'i maua se tasi, ona sa manatu nisi e toe faalelei le fale tuai, a e mana'o foi nisi e fai se fale fou. O le Aso Gafua 24 Ianuari 2019 na usuia ai le fono faapitoa e saili ai se tonu o le galuega, faapea le tulaga tau tupe e fai ai, o ai e faia, a o fea foi e fai ai. O nisi manatu e fai faatasi ma le Maota o le Faifeau, o nisi e fai faafogafalelua. Na toe faamoe le toa, a o faia pea sailiga tupe e ala i le Sene, Atina'e, Lafolafoga faa-Matafale, Bingo, Tausala, ma le au galulue faavaitaimi i atunuu i fafo. Aso Sa 24 Ianuari 2021 na fai le To'onai ma le Fono, ma ave ai le lu'i a le faifeau, latou te Faamati i le Fale fou. Peita'i sa le'i lava seleni, a ua manino mai o le fale fou o le a fausia. Aso Lulu o le Lefulefu, 2 Mati 2022 na tuuina ai lalo le fale tuai, ma amata loa le galuega. E tusa ma le 18 vaiaso (4 masina+2vaiaso) na faia ai. O le tupe faavae e = \$144,109.30.

O Asiga, fesoasoani aiga & aufaigaluega = \$23,810, Su'egatupe i auala eseese = \$73,745.10.

O tauofoga mo le galuega: O le afioga tiakono ia Pauli Munzi Tahim Yu Hoi ma le aiga, na ofoina mai masini ma loli, o uta asuemu aemaise le gaosiga o le iviivi u'amea o le fale, pe a faatupe uma = \$33,500. O Pauli Vaaelua Sene, o uta asuemu ma oneone e tusa le tau = \$2,000. O galuega tau palama uma na faia e Papalii Sio ma le aiga = \$1,500. O ata faataamilo i totonu o le hall na ofoina e le Pule Kolisi Tuasivi, susuga Setefano Logovii FS e tusa le tau = \$3,000. O le fola atoa i le maa, i lona tau ma le leipa, na ofo mai e le susuga faafeagaiga ma le faletua ma le aiga o lona tau aofa'i = \$23,237.24. O le aitalafu na faamauina i le aso 4 Iulai 2022 e \$172,099.25. O le tau aofa'i o le galuega aofia ai ma tauofoga=\$475,000.89.

O le afioga Taitaifono Fono Tele, susuga Iosefa Atapana Uilelea FT, na saunoa fai ma sui o le Ekalesia Aoa e momoli le faamalo ma le faafetai i le susuga Faafeagaiga ma le Faletua ma le Ekalesia i Salelologa, mo la latou galuega ua faia mo le atina'e o le EFKS ma le Malo o Keriso i lenei foi itu. Faapea foi le faafetai i le Matuaofaiva ma le Falefa o le Aiga Salemalama, tainane tapuaiga a le susuga Toeaina ma le Pulega Safotulafai, o aiga ma lupe faalele i la latou lagolagosua. Ona ia tauaao lea le meaalofa faale-faavae a le EFKS e \$10,000. Sa auai ma molimau le afioga Sui Taitaifono Fono Tele, susuga Tunumoso Iosia FT ma le Faletua, le susuga Toeaina Pulega Salega, Tiakono Toeaina, le Pulega Safotulafai, Faifeau Penisione ma lupe faalele a le Ekalesia.

Sa asiasi maimoa le mamalu i lea aso, ma faapa'iaina ai le Maa Faamanatu o nisi o le aufaigaluega na muaimalae i le EFKS Foua ma lagomau ai: Siasi FS (?), Samasoni Lātũ FS(?), Tovia FS (?-1918), Ieremia FS (1919-1941), Vaililo Luteru FS (1942-1955), Faifua Faifua FS (1956-1959), Faamoana Tago FS (1960-1970). O le susuga Tesimeta Afamasaga FS (Toeaina Faaolioli Safotulafai) na faapa'iaina le Maa. *"Ua ou tau le taua lelei, ua i'u ia te a'u le tausinioga.."* Ona alo ane lea i taumafataga ma fa'aaloaloga masani, ma le Keke e 60 fogafale faamamaluina ai le 60 tausaga o le Malo Tutoatasi Samoa. Malo le galulue, faafetai tautua i le Atua. 'Aua ne'i ia te i tatou, a ia tuuina atu le viiga i le Alii o Ia ua mafai ai ona taunuu faamoemoega.

OSI FEAGAIGA EFKS TULAELE

O le Toeaina o le Pulega Faleata Sisifo, susuga Tautua Aurelio FT, na ia ta'ita'iina le sauniga e osia ai le feagaiga a le EFKS Tulaele, ma lo latou faifeau susuga ia Tiafaafo Gatoloai ma le faletua ia Tracy, i le Aso Faraile 29 Iulai 2022. Na lagolagosua i ai faifeau o le Pulega, Nouata Saifoloi FS na faitauina le Tusi Paia, Enoka Pouniu FS na tatalo, ma Letaulau Pesaleli FS na lauga. O le afioga Lavea Lua Nafoi na fai ma sui o le Aulotu Tulaele e fai la latou molimau e tusa ma le latou filifiliga. O le aso 1 Iulai 2021 na faamavae ai ma le Toeaina Penisione susuga Faauga Matautia FT & Maima, ona tofia lea e le Pulega le susuga Sauileone Tanoi FS ma le faletua la te tausia le galuega. O le aso 27 Fepuari 2022 na faia ai le filifiliga mo se faifeau e ala i le palota, na molimauina e le Toeaina ma le Sui Failautusi o le Pulega. E to'a 12 faifeau ma a'oa'o na faia ai le filifiliga, ma e 2 itu taua na faamamafa: (i) Ia o se a'oa'o/faiifeau na i'u mai Malua (ii) E le tau lona gafa i se aiga o le Aulotu. Na fulisia le Ekalesia i le susuga Tiafaafo ma faamaonia ai loa le iuga o le palota. O le aso 5 Mati na latou feiloai ai, na talia lelei le savali, ma fai ai loa fuafuaga mo le aso e osi ai le feagaiga.

Na tali fuaitau foi le susuga Tiafaafo i le agaga faafetai i le Atua mo le valaauina o i la'ua e ala i le faatofalaiga a le EFKS Tulaele, faapea le faafetai i le tapuaiga a matua ma aiga, o la'ua matua faaleagaga ma o la'ua nuu - Lalomalava, Iva, Sapapalii, Falevao ma Lefagaoalii, faapea foi Leauvaa, Savaia ma Alamagoto, aemaise le EFKS Alafua sa osia ai la la'ua feagaiga e le Toeaina Penisione ia Tavita Anesone FT. E le faagaloina foi le tapuaiga a le Tamaitai Pule ma le au uso Faiaoga o le Kolisi Maluafou, faapea a la'ua paaga faale-tausaga i Malua. Na i Malua 2005-2008, ma galue ai i galuega a le Ekalesia i lalo o le vaaiga a le Komiti Faa Misionare ma le Komiti Aoga. Ua la'ua sauni e fai le galuega ua leva ona faatali ai mo se avanoa, ma tatalo ai ina ia latou galulue faatasi ma si a la'ua Aulotu i Tulaele, mo le manuia o le galuega a le Atua. O i latou na valaaulia e faafeiloa'i le faifeau ma le faletua e aofia ai le Taitaifono KAT, le KMTA ma le Tiakono Toeaina Matagaluega Faleata, Failautusi Pulega ma le Matagaluega, Tama Penisione ma sui o le Aulotu. Na tualuga le sauniga i le Sakarameta o le Faamanatuga na ta'ita'iina e le susuga Tiafaafo.

MALAGA LE TA'ITA'IFONO

MO LE ULUA'I TAIMI

Talu ona tula'i mai le afioga i le Toeaina KMTA o Lotofaga Lepa Aleipata (LLA), susuga Iosefa Atapana Uilelea FT, i le Laulau a le Fono Tele i le tausaga 2019, o lea faato'a mafai ona maua le avanoa e malaga atu ai mo mataupu a le Ekalesia i Matagaluega i fafo. Ua lē pō malaē, i aafiaga o le Faama'i Koviti-19, na tapunia ai femalaga'iga faavaomalo talu le tausaga 2020, o le mafuaaga lea sa lē mafai ai ona auai atu le mamalu o le Laulau a le Fono Tele, i le tele o faamoemoega o Aulotu, Pulega ma Matagaluega i Amerika, Niu Sila, Ausetalia, Hawaii, Fiti ma Amerika Samoa.

Peitai lenei tausaga, ua faaitiitia le malosi o le Faama'i, ma ua tatala ai tua'oi faavaomalo mo femalaga'iga. Ua talafeagai lea ma le valaaulia mai le EFKS Hornby, Pulega Canterbury i le Matagaluega Laumua o Aotearoa, mo le faapa'iaina o la latou galuega, le Maota o le Faafeagaiga. O le faamoemoe autū lea na malaga ai le afioga Taitaifono ma le Faletua ia Tekimatang i Niu Sila i lenei masina mo le ulua'i taimi. O le Aso Tofi 4 Aokuso na tu'ua ai le atunuu e lana afioga le Taitaifono ma le Faletua, taunuu manuia ma feiloa'i ai ma le Susuga Fitifiti Luatua FS ma le faletua ia Mamere, o le faafeagaiga taulagi a le EFKS Hornby.

O le Aso Toonai 6 Aokuso na faataunuu ai le sauniga o le faapaiaina o le Maota o le Faafeagaiga. Sa ta'ita'i le Susuga i le Toeaina o le Pulega Canterbury, Susuga Faleulu Malaulau FT, a o le faletua o le Taitaifono Fono Tele na ia ooti le lipine sa tatala aloaia ai le galuega e tusa ma le NZ\$600,000+ lona tau. Na saunoa le afioga Taitaifono Fono Tele e molio'o le viiga o le Atua Mata'isau, e ala i le faamalo ma le faafetai i le Susuga faafeagaiga ma le Ekalesia Hornby e tusa ma la latou taulaga osi i atina'e tetele. Sa faamanuia le Susuga Toeaina fai ma sui o le Ekalesia Aoao i le Aulotu, faapea foi le afioga i le Matuaofaiva ma le tapuaiga a le Toeaina ma le Pulega. Ona ia tauaao lea le meaalofa a le Ekalesia Aoao e NZ\$10,000. O le Aso Tofi 11 Aokuso na toe taliu manuia mai ai le faigamalaga mamalu.

AU TAUMAFAI IA IULAI

O LE TAGI A LE TAGATA AGASALA

Matua: Salamo 51:4, *”Ua ou agasala atu ia te oe, na o oe lava; ua ou faia foi lenei mea leaga i ou luma; e tonu ai oe i lau fetalaiga, e sa’o foi oe pe a e faamasino.”*

O le mau faasoifua maloloina – e pei ona aogā mo le fatu le ‘ata’ata fiafia, e faapea foi loimata pe a maligi, na te gaepu i luga, vailaau aogā mo neura o le tino. E tofu le tagata ma le mafuaaga e tutulu ai. E tagi le faanoanoa, e maligi foi loimata o le fiafia tele. E tagitu’i le ita, i le lailoa e fia tau ma sui, e tagi lotulotu foi le alofa, i le fia pa’i atu e faamafanafana. O Isaraelu, ma isi atunuu, e totogi tagata faapitoa e fetagisi i se maliu, o le ‘au fetagisi faapolofesa. Faafetai e leai sa tatou aganuu faapea, o le tagi faafoliga, tautua faasesē. E i ai uiga loloto faaleagaga, o lenei natura o le tagata o le tagi. E pei o la Paulo ia Roma, *”Ia outou olioli faatasi ma e ua olioli; ia outou tagi foi faatasi ma e ua fetagisi.”* O le uiga o le mau, ia mulumulu afoe, ia fefaamagaloa’i, ma ia tutū faatasi, i le molimau, ma tautua le Ekalesia, tainane faigamalo ma le tausiga o aiga. Ne’i tautua faamaoni nisi itutino, a e tagitagi taamilomilo pea nisi vaega. O le tagi e faamamafa nei, o le tagi a le tagata agasala – o le upu faatusa, e faamatata ai **faato’esege** ma le **salamō faamaoni**. Ma o le tagi lenei, e lē faasino i le maligi o loimata, po o le auēuē leotele, auā ua na o se faafoliga mai fafo, mo le vaaiga a tagata. A o le tagi a le tagata agasala ua salamō a’ia’i, e sili ona tāua lagona faamaoni i le loto ma le agaga, e fua aliali mai, i suiga o le amio faapa’iaina ma auunaga lelei.

O le Salamo 51, pe a faatusa i la tatou aganuu o le Ifoga, o loo pulou ai Tavita i le le o le Malo, le Toga mamae ma lautele, o le Pulou o le Ola, i luma o le Atua Silisili Ese. O le ifoga o loo sasa’ataoatua mai ai loimata o lona loto nutimomoia, ua ta’utino lona matuā faatauva, ua iloa le matavale o lana soligatulafono, na ia faao ai le oti i se tasi o ana tautua tuāvae, le sa Heti o Uria, a e mulilua i lana avā o Patisepa. Ua pulou ai nei le pagota, i Malae o le Mā, e tau ufiufi lona masaesae, lona eleelea, lona lē lavalavā faaleagaga, a o nofo i le ‘ie talatala, ma asuasua le efuefu i lona ulu.

”Le Atua e, ia e alofa mai ia te a’u, e tusa ma lou lava alofa; e tusa ma le tele o lou alofa mutimutivale, ia e sōloi’esea o’u solitulafono.”

E mata’ina le faatomua o le ifoga a le tupu, i lona tātā o le alofa tunoa, ma le alofa mutimutivale o le Tupu Silisili. E talitonu maumaututū o ia, i le Atua e telegese lona toasā, a o lona alofa mutimutivale e silisili ese ia, o le alofa e faavavau. Ua masani ai Tavita i le alofa faapalepale, le alofa lavea’i o lona Atua; ua mafanafana la la’ua masaniga vavalalata, o le alofa moni faa-Tamā i le atalii.

Pe afai e mautū ma maua’ā lo tatou faatuatua i le Atua, ma ua moni foi lagona o le loto, ona vave lea ma faigofie ona ui magalo la tatou sala, e talia mai a tatou faatoga mamate, ma faamagalalo loa i lea lava taimi, e lē toe tolopō atu se’ia afea. A e afai tatou te faalotolotolua ma masalosalo, o lona i’uga o le teena, leai se apili, e lē toe taliaina lava, ma tatou fano ai.

O i tatou matua ua iloa le eseesege o le tuu o le fanau e ta’e’ele latou, ma lo tatou matuā tago atu e faamamā. O le aioi a Tavita, ia pa’i mai aao alofa o le Atua e faata’ele, fufulu ma faamamā ia te ia. E le’i faatauagavale Tavita i le a’oa’i atu a Natano, se taimi foi ona momoli lea o mamoe i le au ositaulaga e faamū. A o le faamuamua i le taimi nei, o le loto momomo ma le nutimomoia, e fia silasila i ai le Atua. O taulaga sili ia, i le tagi a le tagata agasala. Le tagata ua na iloa, ua ta’uvalea lona aiga, le nuu ma lona itumalo, ua inosia le nofoa ma le faiga malo a Isaraelu, ina ua lape lana faatofalaiga. Ae sili ona mamafa ia te ia, le finagalo paia o le Atua, ma Lona faamoemoe na tofia ai o ia e fai ma tupu. *”Ua ou agasala atu ia te oe, na o oe lava; ua ou faia foi lenei mea leaga i ou luma;”*

E le’i atu matagi Tavita i manatu o tagata – faitalia i latou ma o latou finagalo, po o ā faitioga, tala faasalalau e tu’ua’ia ma faaleaga, aemaise i latou sailiili masei, o ‘ai a le matagi. Na te le’i taumafai foi e pupuni le gutu o Natano i tupe ma tofi, ia ‘aua ne’i aliali lana mea sesē. Pe na ia togi foi le moa e taavili, a e ‘u’u lona ‘afa. Leai, na lafoa’i atoa o ia, o le ā le faai’uga a le Atua Faamasino Sili, e alu lava i le i’a a le faalolo. Ua tagi Tavita.

A o le isi itu, seanoa le leo faa-perofeta o Natano, e le iloa e le tupu, e solitulafono lana amio na fai. E le’i tu’ufaua e le perofeta. Auā o nisi, o ē i ai le paoa faa-Tavita, e manatu o se penefiti faapitoa, poo se ponesi, le tuusaunoo o a latou faiga pi’opi’o, e lē oo atu i ai le tulafono. Pe laulau ane foi galuega lelei sa fai, e ta’ulelei atu ai ma galuega a le tiapolo. E aogā

ai le fautua potu, le tuualalo atamai. “*E sili ona lelei o le a’oa’iga ua aliali mai, i le alofa ua lilo.*” E ao ai ona tatou leo tetele i le tiute faaperofeta, faamalolosi i le faiva o Masefau, auā e logo le tuli i le tā tā, e tupu le faatuatua, faaosofia le salamō, ina ua lē mapu la tatou tā tā logo.

O le taunuuga fiafia o le tagi a Tavita, na soloiesea e le Atua ona loimata, faamagaloina lana agasala. Fai mai lana ta’utinoga, “*Ou te a’oa’o atu ou ala i e ua solitulafono; ona faaliliuina atu ai lea ia te oe o e ua agasala.*” O le polokalame toefuata’iina a Tavita, lona ta’uta’u atu i isi tagata agasala, mea tetele ua faia e le Atua mo ia. E fa’aaogā lona potu masani faa-tagata agasala, faa-tagata salamō, e a’oa’iina ai lona aiga, lona malo, lana tapuaiga, ina ia faapea foi ona latou faata’ita’i, e fultua ma lafoa’i amio leaga, a e fai suiga lelei, ma talitonu i le alofa lavea’i o le Atua.

O le Sapati a le au Kerisiano, le ulua’i aso le amataga o le vaiasosa, le aso na toetu manumalo ai lo tatou Alii o Iesu. Pe a toe vaai i le ata o le au soo i lena ulua’i Aso Sa! O le taeao o le fetagisi. O loo tagi i le faanoanoa ma fememea’i, ona ua faasatauroina lo latou Alii o Iesu. Na asiasi e u’u lona tino, a ua leai, ma atili ai le atuatuvaale. “*Funa e, se a le mea e te tagi ai?*” Na maua le tala fiafia uiga ese, ua toetu Iesu! Ona suia lea o le tagi faanoanoa, i loimata o le olioli, o le tagi i le fiafia ua tetele, ona o le Tala ua maoa’e lona Lelei. Tasi o le mea, o loimata ia na mafuli i le itupā o Tina ma Tamaita’i, o lo latou taeao lea. Auā o le itupā malosi, paga lea, sa punitia pea o latou loto, sa le’i talitonu i le toetu. O le au soo ua tatau ai le tagi a le tagata agasala. Mulimuli ane, i le taeao o le Aso Sa na sosoo ai, ona fa’aali lea o le Keriso Toetu. Ua fa’aali mea na tutu’i ai fao ma tu’ia i le tao. Ua auina atu i latou e tala’i le salamō, ma le faamagaloina o agasala i nuu uma, e amata mai i Ierusalem. E amata mai ia i latou, ina ua latou tausolomua e salamō faamaoni. O le aso o amataga fou ma suiga fou, e o atu e fai nuu uma lava ma soo.

Le Au Taumafai Kerisiano ma le atunuu pele, ua laulogo tulimanu e fia o le lalolagi, i taualumaga o lou lotoifale, faalemalo, faale Ekalesia. Ua e folau i lagimā, ua folau ma le faatuatua. A e tagi’ū’ū pea le agaga, ona o nisi vaivaiga faa Tavita tuai, o fai ma faapa’ia mata. O moomooga o le loto, se inā salamō ia, tanuma’i mea ua tuana’i, lafoa’i le tagata tuai, toe fai se amataga fou. Ioe o i tatou o tagata agasala, o le au taumafai e vaivai, e pa’ū’ū gofie, e sala soo ma

sesē pea. A o le alofa tunoa o le Atua, ua lava ma totoe e faamamā uma ai a tatou agasala. Na te fia fa’aaogā pea lou soifua toefuata’iina, ma lo tatou ola ua faafouina, mo ana feau ma lona finagalo.

E leai se mataua o ou loimata maligi, ma lou afu sisina e lilo i le Atua. A e sili ona fia silasila o Ia, i foliga o le tagata e toe foi atu ma le salamō ia te Ia. O loo faatali mai, i lou liliu atu, auā o le alofa e taumulimuli. Na te opoopo ma fusifusi oe i Lona fatafata, na te sogi ma faamamā, e faa’ofu i le ofu tatapuvae aupito lelei, e faase’e i seevae fou, ma tuu le mama i ou lima. E fasi foi le tama’i povi peti, e sami ai lou tagata na leiloa, a ua toe maua, na oti a ua toe ola. Amene. *Saunia e le kamupani a le Sulu Samoa.*

TATALA FINAUGA AUTALAVOU

O le Taitaifono Komiti Au Toeaina susuga Asotasi Gu Time FT, na ia ta’ita’i le sauniga e tatala aloaia ai le polokalame o le FINAUGA A AUTALAVOU (Youth Debate) o lenei tausaga. O le sauniga na faia i le malumalu o le EFKS Uafato i le afiafi o le Aso Sa 24 Iulai, na auai le aufaigaluega faifeau ma faletua ma Autalavou ta’i to’a 6 mai le Pulega Aleipata faapea le Pulega Fagaloa, o Autalavou nei o le a tausinio. O le Manatu Autu o lea Aso Sa - Sapasapaia e agelu - na faavae ai le Upu ta’iala i lenei sauniga mamalu. O le vaiaso lava lea na amata ai le ulua’i taamilosaga, lea na fesaga’i ai Autalavou mai Ulutogia ma Mutiatele i le finauina o le mataupu - *Ua tatau ona soloia le nofoa o le 10%*. O le isi finauga e faia i le va o Salimu (lagolago) ma Uafato (tete’e) i le mataupu - *E ‘ai e matua vine moto, a e magiagia ai nifo o fanau.*

O Faamasino filifilia mo le galuega faigata o lenei tausaga, e aofia ai le Ofisa Sinia mai le Ofisa o le Komesina Faiga Palota, ma le afioga i le Faia’oga a le Malo ia Mulipola Mose Tuae, faapea le susuga ia Leefu Pule AM (Pule EFKSTV) e fai ma sui o le aufaigaluega. O le a faagasolo pea faafinauga i le va o Autalavou, i nofoaga ua atofa o Taelefaga i le Pulega Fagaloa, ma Saleaamua i Aleipata, se’ia oo ina taualuga i le sailiga o le siamupini i le faai’uga o le tausaga pe a aulia i le alofa o le Atua. O loo lagolagoina malosi lenei polokalame a le EFKSTV, e kamupani o le SSAB, Samoana Rentals, MOH (Breastfeeding), ma le Ofisa o le Komesina Faiga Palota, faatasi ma le tapuaiga a le Komiti Faamisionare o loo nafa ma le vaaiga o lenei atina’e a le Ekalesia, mo le faasalalauina o le Tala Lelei i soo se auala. Ia manuia finauga o lenei tausaga.

O LE PEROFETA MULIMULI

(O le Tala Faasolo Faafagogo ua faaSamoaia mai le Tusi, "The Last Oracle" a James Rollins)

Na ia toe pulato'a atu i le masini e siaki ai le tā tā o le fatu, sa faafesoota'i i lona fatafata i uaea. Ma le tulimanu sa tu ai le isi masini e siaki ai le toto maualuga ma le tulaga o le aivī. Pe afai la e mafai e ia ona faaigoa masini sa taatitia i ona autafa, e faapefea la ona ia lē manatua lona lava igoa? Na ia tau saili i le tuana'i mo se mea e taula i ai. Peitai o tua atu o lona ala a'e i totonu o lenei potu pogisā, na te lē manatua se mea e tasi.

O le tama pito i laititi mata sa ia mate'ia le faatupula'ia pea o lona faalētonu. Na la'a ane i luma le tamaitiiti, o ona mata lanu moana na sulua i le molī uila penitala. Monike - pe afai o lona igoa moni lea - na ia lagona e sili atu ona iloa o ia e le tamaititi, nai lo ia lava. O le faamaoniga o lea mea, o le tamaitiiti sa pei na te faitauina lona fatu, ma tautala na o upu e save'uina o ia mai lona moega.

Na sii a'e i luga e le tamaitiiti lona lima itiiti, ma faavalavala ona tamatama'ilima, o loo sipela mai ai lona mana'oga. "Lavea'i i matou."

5 Setema, 9.30 i le po.

"Serenopila?" na fesili atu ai Elisapeta. "O le ā le mea na fai a lo'u tamā i Rusia?"

Na ia faatau pupula atu i isi tamaloloa e to'alua i luga o le laulau inu kofe. O ia sa nofo i le nofoa e fai faalagolago o lima, o lona tua i se ata faamalama e iloa atu ai le vaomatua o le Paka o Papa Kuriki. Na aumaia i latou e se taavale iinei ina ua mae'a le solaaga mai le fale mataaga. Na fa'aaoga e Karai upu o le fale saogalemu, e itiiti lava sona sao i le faatupuina o lona saogalemu. Sa pei o se mea na tupu mai se tusi faitau faa-sipai. Peitai o le matagofie o le fale - o se fogā fale lua na fausia e se mataitufuga atamai i piliki kilina ma faalamolemole i le aoa taika - na fesoasoani i le faanofofilemuina o ia.

I se isi vaaiga.

Na ta'ele ina ua taunuu mai, fufulu ai ona lima mo se taimi umi ma asu vai i ona mata. A o lona lauulu sa namuasua pea, ma ona atigilima sa valivalia pea. Mulimuli ane, ona nofonofa lea mo le lima minute i luga o le faa-nofoa ma ona foliga i totonu o ona lima, a o taumafai e faatulaga lelei mea na tutupu i nai itula ua sola. Na ia lē iloa sa tagi o ia, pe ana ia lē vaaia

ona lima o susū i loimata. Sa fai lava sina tele ma mamafa mo ia. Na te le'i mafai lava ona maua se avanoa lelei e faavasega ai le maliu o lona tamā.

E ui ina sa ia lē masalomia e moni ua tupu, a e na te le'i taliaina maumaututū lona moni atoatoa.

Se'i vaganā ua na maua ni tali.

O fesili na na latou aumaia o ia mai fafo o le fale ta'ele.

Na ia faatau pupula i le tagata fou o nofo mai le isi itu o le laulau inu kofe. Na faalauiloa mai le tagata o ia le pule o Karai, o le Faatonu ia Penita Koloue.

Na ia maitau faasolo ia te ia. O ona foliga sa pei e sapaasapa, o lona tino sa mū i le lā. E tusa ma se foma'i su'esu'e i tagata, na ia faitauina o se tagatanuu Amerika mai ona fofoga - e ui ina sa lanu moana. O lona lauulu sa uliuli ma nai sinasina i luga a'e o le tasi taliga, e pei o se fulu manu o sulu ai.

Na nonofo toalua ma Karai i le sofa, a o ia feminoia'i solo ma su'esu'e le faaputuga pepa i luga o le laulau. A e le'i maua e se tasi se taimi e tali atu ai i lana fesili, na foi ane Koualasaki mai le umukuka ma ona vae lapopo'a. Na ia faataatia ona seevae ua uma ona polesi i luga o le matāafi maalili. "Na ou maua nai masi ma ni mea pei ni sisi. Ou te lē mautinoa. A e na 'ai a latou salami."

Na ia punou atu e faataatia le ipu mea'ai i luma o Elisapeta.

"Faafetai lava Sio," na ia tali atu ai ma le fiafia i ona foliga fiafia ma le agalelei i totonu o le mau misiterio o si'omia ai.

Na pei e matamuli le tamaloa i autafa o ona taliga. "Aua le popole," na ia mumumumu atu ai a o faasa'o i luga lana tu. Na ia tusi faasino i le ipu mea'ai, pei ua galo lana tala sa tau fai atu - ona lūlū lea o lona ulu, ma faasaga ifo e toe iloilo ona seevae.

Na toe nofo sa'o i luga Penita, e faatosina mai le pupula a Elisapeta. "A e i le mataupu ia Serenopila, matou te lē iloa le mea na alu ai lou tamā iina. Sa matou siakia lona tusi folau. E leai se faamaumauga na asiasi i Rusia, faapea foi, lona toe foi i Amerika. Na ona matou tau mate, sa fealua'i o ia i se tusi folau sesē. O faamaumauga mulimuli o loo matou maua i ana malaga, e mai le lima masina talu ai. Na lele o ia i Initia. O le taimi mulimuli lena na matou iloa ai o ia."

Na luelue le ulu o Elisapeta. "E masani ona malaga iina. E silia ma le faalua i le tausaga."

Na nofo sa’o i luga Karai. “I Initia. Aisea?”

“Mo se avanoa mo su’esu’ega na maua mai ai se fesoasoani. Ona o ia o se fomai tau neura, na ia su’esu’e ai mo ni faavae tau totoga mo lagona faaosofia o tagata. Na la’ua galulue faatasi ma se polofesa o saikolosi i le Iunivesite o Mumopai.”

Na faatautetē atu Karai i lona pule.

“O le a ou vaai ai,” o le tala lea a Penita. “A e na ou faalogo sa fia iloa e lou tamā mataupu tau faalogona ma malamalamaaga. O le mafuaaga tonu lena o lona aafiaga ma le au Iasoni.”

O le upu mulimuli lea na faasino tonu mo Karai, a e o Elisapeta sa faamalō i le ta’u o le igoa o le faalapotopotoga. Sa le’i mafai ona natia lona lē fiafia.

“Oi, o lona uiga e te iloa le vaega lena – le au Iasoni.”

Na tepa atu Penita ia Karai, toe vaai ane i le tamaitai.

“Ioe, matou te iloa sa galue lou tamā mo le vaega lena.”

“Galue? Na ia matuā militino ma i latou.”

“O le a le uiga o lau tala?”

Na faamatala e Elisapeta le galulue faatasi o lona tamā ma le militeri, ma liua ai e aveva ma se mafutaga militino vavalalata i lona tamā. O tau mafanafana uma lava, e ninimo ese ai o ia mo nai masina e tolu pe sili atu i nisi taimi. O le tele o ona tausaga na totoe sa tuu atu atoa i ona tiute faa polofesa i le M.I.T. O le i’uga, na seāseā mau o ia i le aiga. Na afaina tele ai le va o ona matua. O finauga na i’u i misa ma fusuaga. Na faasolo ina talitonu lona tina, o loo fai se faanuminumi a lona tamā ma se isi fafine.

O le vevesi i le aiga na ia tulia mamao ese lona tamā. O le faaiipoipoga na malosi ma mautū ua malepelepe. O lona tina sa inupia faalausosoo, ma i’u ai ina pa’ū ifo i le tofē. Ina ua atoa le sefuluono tausaga o Elisapeta, sa onā lona tina ma lavea ai le taavale a le latou aiga ina ua tofū i le Vaitafe o Salesa. Sa le’i mafai ona iloa tonu pe se faalavelave tupu faafuase’i, po o se pule i le ola.

Peitai na iloa e Elisapeta le tagata e pa’ū i ai le uluulu o le laau. E mai lena aso, e le’i toe tautala Elisapeta i lona tamā. Na faasaga le tagata ia i lona lalolagi. Lenei ua alu atu foi ma ia. Alu e faavavau. E ui i lona gaogao, sa le’i aveeseina ai se fatu mumū o le ita i lona tamā. E oo i lona maliu tulaga ese sa tu’uina mai ni fesili se tele aunoa ma ni tali.

“E te manatu o lona aafiaga ma le au Iasoni e i ai se fesootaiga ma lona maliu?” na ia fesili atu mulimuli ane.

Na lūlū le ulu o Penita. “E faigata ona iloa lena mea. O lea faato’a amata su’esu’ega. Peita’i sa mafai ona

ou maua le poloketi faamiliteri tonu na feagai ma lou tamā. Sa ta’ua o le Poloketi – “

– Sitāketi”, na faauma atu ai e Elisapeta mo ia. Na ia talia nai faamalieina mai foliga te’i o le tamaloa.

Sa nofo sa’o atili i luga Koualasaki i autafa o le ta’inafi. “E, na ou matamata i le ata tifaga lena. . . e i ai tagata mai isi paneta ma mea faapena, e sa’o?”

“Leai e ese le Sitāketi lena, Sio,” na ia tali atu ai. “A e ‘aua e te popole Kolouē. E le’i solia e lo’u tamā lana kilia o le faalilolilo aupito maua luga. Na ou faalogo o ta’ua e lo’u tamā le igoa o le poloketi i nisi taimi. Tusa e sefulu tausaga mulimuli ane, na ou faitau ai i lipoti faatagaina mai le CIA, na faatagaina e ala i le Tulafono mo le Faasaolotoina o Faamatalaga.”

“O le a le mea e faasino i ai lena poloketi?” na fesili ai Karai.

Na lue atu le ulu o Penita i le faaputuga pepa i luga o le laulau. “O lena i totonu iina faamatalaga auiliili uma, e oo i tua i le Taua Malulu. Sa vaaia aloaia e le tanetau faalemafaufau lona lua a le atunuu, le Inisitute o Suesuega o Sitanefoti, o lona faasologa e aveva ma fesoasoani i le atina’e o tekonolosi faalilolilo. I le 1973, na faatonuina le inisitute e le CIA ina ia fai se sailiiliga i le fa’aaogāina o le parasaikolosi e fesoasoani i faatasiga a le vaega’au.”

“Parasaikolosi?” na siitia i luga laumata o Karai.

Na lūlū le ulu o Penita. “Telepafi, telekinesisi. . . a e silisili ai le faamamafa o le vaaiga mamao mai, e fa’aaogā ai tagata taitoatasi e sipai i luga o nofoaga ma taualumaga, mai nofoaga mamao e fa’aaogā ai le malosi o latou mafau. Tai pei o se telepafi i se mea mamao.”

Na mānava a’e e Koualasaki lona faatauemu mai le isi itu o le potu. “O sipai ulu leaga.”

“E moni e logo matavale, a e ao ona e malamalama i taimi pogisā o le Taua Malulu, soo se laasaga e mata muamua ai le au Rusia, e tatau lava ona faafetaia’i e a tatou vaega’au su’esu’e. E le’i ai se avanoa e tuu faatamala, ne’i i ai se va faatekonolosi e tula’i mai. Na taumafai malosi Rusia e tapuni uma. Mo Rusia, o le parasaikolosi, o se matatā faa-amio pulea a’oa’i lautele, e aofia uma ai paionisi, paiofisi, saikofisi, fisiolo, ma le neurofisiolo.”

Na lue atu le ulu o Penita ia Elisapeta. “E pei o le galuega a lou tamā sa faatautaia i lagona ma mafaua. Le tulaga tau neurofisiolo o loo i ona tua.”

Na tepa atu Elisapeta ia Karai. Mai le pupula pūiti o ona mata, na iloa ai e faalē talitonu o ia, a e sa ia faalogologo pea ma le filemu. Sa faapena foi o ia.

“E tusa ma lipoti a le CIA, sa amata ona maua i’uga o taumafaiga a Rusia. Ona oo lea i le 1971, na faafuase’i ai ona alu le polokalame a le au Sovieta i le faatulagaga o le uliuli pato’i loloto. Na matuā leai ni faamatalaga na maua. Na pau le mea na tatou mautinoa, sa fa’auau pea su’esu’ega i Rusia, faatupe e le KGB. Sa tatou taumafai e tulitatao i soo se auala, ne’i tuua mamao i tatou i tua. Ona faatonuina lea o le Inisituti o Suesuega i Sitane Foti e fai i ai se su’esu’ega.”

“O a la ni i’uga o latou su’esu’ega?” na fesili ai Karai. “E tele lava ina fefiloi,” na faamaonia ai e Penita. Na faitauina foi e Elisapeta lona lipoti lē faasaina. “O le upu moni, e itiiti lava se i’uga manuia o le poloketi.”

“E lē sa’o atoatoa lona tala,” na oso atu ai Penita. “O lipoti aloaia na faailoa ai, o vaaiga faatonutonu mamao na latou maua mai i’uga i le sefulumalelima pasene o le taimi atoa, o se aofai e i luga mamao atu o le fua faatata e faamauina ai tulaga lēmautonu. A o lona foi sa i ai nisi mataupu tulaga ese faapitoa. E pei o le alii tusiata Niu Ioka o Iniko Suani. Sa ia mafai ona faamatalaina ata o maota tetele i ona auililiga matagofie pe a tuuina atu i ai na o fuanimera o le umi ma lautele i luga o le kelope. O ana taumafaiga e tusa ma lipoti a nisi ofisa, na ausia le valusefululima pasene.”

Mata sa maitauina e Penita le masalosalo pea o i la’ua i la la’ua vaai. Na ia tātā le faaputuga pepa. “O i’uga a le Inisitute o Suesuega i Sitane Foti na faamaonia ina ua toe su’esu’eina i le Olo i Meate faapea le Fale Su’esu’e Inisinia o Faalētonu i Perenisetone. E faaopoopo i ai nisi o mataupu iloga na maua. O se tasi o mataupu logologoā e aafia ai le ave nanā faamalosi ma le toe lavea’iina mai o le Alii Ta’ita’i’au Aoa o Iakopo Tosia. E tusa ma le molimau a le alii fisi sa feagai ma le poloketi, o se tasi tagata vaai mamao na ia maua le igoa o le aai sa taofia ai le ta’ita’i’au, a o le tasi tagata vaai na faalauiloa foliga auilili o le maota, e oo lava i foliga o le moega na noanoatia i ai o ia. O i’uga faapenei e lē faigofie ona vave faate’a ese.”

“A e na faate’a ese lava.” o Elisapeta lea. “E tusa ma lo’u malamalama, na faagata le su’esu’ega i le ogatotonu o le vaitaimi o le 1900. Na faataape le polokalame.”

“E le’i matuā taape atoatoa,” na faaopoopo faalilolilo atu ai Penita.

A e le’i faamatala atu e ia, na faafelavei Karai. “A e toe foi i le amataga, o le a le fesootaiga o nei mea

uma i le au Iasoni?”

“O le mea tonu lena lea na ou faasolo atu i ai. E foliga mai o le Inisitute o Suesuega i Sitane Foti, e pei o le au Sovieta, na amata ona latou faalautele atu i tua faavaa o a latou su’esu’ega, ina ia aofia ai ma isi amio pulea faa saienisi.”

“E pei o le faa-neurofisiolo,” na fai atu ai Karai. “Le galuega a le alii Foma’i o Poleki.”

Na luelue le ulu o Penita. “A o faatulaga loloto le puipuia malu o le poloketi, na latou fesootai ma sapalaia le au Iasoni e to’a lua o ē na faia su’esu’ega faapea. O le tasi o i laua o lou tamā, Elisapeta. O le isi o le alii Foma’i o Tereni Makepalai, o se inisinia faafomai o le ola i le fisiolo o le mafaufau.”

Na iloa e Elisapeta le igoa lea. Na te manatua asiasiga, feiloa’iga ma fono faalilolilo a lona tamā ma tagata ese i lona ofisa i le leva o le po, e aofia ai ma Foma’i Makepalai. E faigatā ona faagalo i lona leotele ‘o’olo, a e i se agaga lelei. Sa masani foi ona ia aumaia ni meaalofa mo ia a o laitiiti. Lomiga muamua o Nanisē Telū.

“Na ou taumafai e faafesoota’i Fomai Makepalai,” na fa’auau ai Penita. “Na pau le tala na maua e leai se tasi na toe faalogo ia te ia i le lima masina talu ai.” Na faalogoina e Elisapeta le tete maalili. Lima masina. “O le taimi tonu na lele ai lo’u tamā i Initia.”

Na la’ua faasoa ma Karai i se pupula o le popole. Pe se a le mea na tupu?

9.40 afaifi.

Na ulufafo Iuri Raeva mai le lifi i le fogafale o i ai le fale su’esu’e. Ina ua uma ona fai lana telefoni, ona alu lea o le fasefululima minute e taunuu ai i le Inisitute o Suesuega a le Ami Uota Riti i Merilani. O le fale e afa miliona futu faatafafa o avanoa fai suesuega, o le tele na fausia fuafua mo le suesuega BL-3 o lamatiaga o le ola, o lona uiga e feagai ma soo se ituaiga o faama’i pisia. Sa fa’aaogā e Iuri le faailo o le fememea’i – Panatora – e fesootai ai i le au Iasoni. Na alu le isi sefulu minute e fesootai ai se feau faalavelave faafuase’i i nisi sa ia sailia, o se vaega faalilolilo maototonu o le faalapotopotoga na latou faifai mea faatasi ma le au Rusia i le poloketi mo le lelei atili o malo uma e lua. Sa faamoemoe Iuri e galue le Iasoni fai mona sui, ina ia puipuia Sasa mai le oo i ai o lima o Mapeletope. O Iasoni, faatasi ma lo latou poto masani faasaientisi, na malamalama lelei i le fiafiaga maualuga na latou maua i le taulimaina o le teineitiiti, e le gata i le fisiolo tau le tino, a e faapea foi le faasaikolosi o le mafaufau.

(Fa’auau Sulu Samoa Aokuso 2022)

NA O AFIOGA E TULEI MAI FOFOGA O LE ALII

O FAAMANUIA E TOLU

I le ogatotonu o le vaitausaga 1980, na pulea ai e le alii o Sitivi Paterika Morisei, po o ‘Moz’, le faatulagaina o pese faasalemausau i totonu o Peretania. Sa lauiloa i ona lagona faapei foi o ana musika, o ana fatuga e tele ina fa’aautū i lagona atuatuvaile. Sa faamamafa faiā gausia, fale kalapu gaogao, ma le mamafa o le leai o se faamoemoe o le tuana’i. O se tagata na lauiloa, a e na ola i se olaga e aunoa ma se fiafia.

E lē faatusalia o ia, a e tuufaafegai ma le eseese o le ituaiga olaga na valaau le Alii o Iesu i ona soo ina latou ola ai! Se olaga fiafia, ma faamanuiaina. E tolu taimi na faaloto tele atu ai Iesu i ona soo, mafuaaga e ao ai ona latou loto tetele ma fiafia (be of good cheer). E faamatalaina e le faifeau o le Tusi Paia o Philip De Courcy, ‘O Faamanuia e Tolu o le Feagaiga Fou’:

(1) O le ulua’i mafuaaga e tatau ai ona fai se faamanuia o le fiafia, ona ua faamagaloina a tatou agasala ma ua faagaloina ia Keriso Iesu. *“²Lo’u atalii e, ina faalototele ia oe, ua faamagaloina au agasala.”* Mata.9. Talu ai ona o Kalevaria, e lē toe fa’aaogāina o tatou vaivaiga ma faalētonu e molia ai pe faamasinoina ai i tatou. *“²⁴E moni, e moni, ou te fai atu ia te outou, o lē faalogo mai i la’u upu, ma talitonu ia te Ia na na auina mai a’u, ua ia te ia le ola faavavau; e lē oo foi o ia i le faamasinoga, a ua oo atu o ia i le ola, sa i le oti.”* Ioa.5.

(2) O le mafuaaga lona lua e ao ai ona fiafia ma fai le faamanuia, ona tatou te lē o tau, mo se manumalo, a e mai le itutaua o le manumalo. *“³³E maua outou e le puapuaga i le lalolagi, a ia outou loto tetele, ua ou manumalo i le lalolagi.”* Ioa.16.

(3) Ma le mafuaaga lona tolu e fai ai le faamanuia, ona e i ai Iesu faatasi ma oe, tusa lava po o a mea e tau’ ai atu e le olaga ia te oe, o ai foi e faasagatau atu ia te oe. E pei o le au soon a matata’u i luga o le vaa na fetosoa’i solo e le matagi, e i ai o Ia iina pe a e manaomia o Ia. E mautinoa lana Upu ia te oe: *“²⁶Ua iloa mai e le au soo...ona atuatuvaile ai lea...uiō i le matata’u. ²⁷Ona fetalai atu loa lea o Iesu ia te i latou, “Ia outou loto tetele; o a’u lava, ‘aua tou te matata’u.”* Ioa.14. O le filemu e lē o le aunoa ma ni afā. A e o le iloa lea o loo i ai Keriso faatasi ma i tatou (Roma 8:39).

(4) Aumai loa ni faamanuia se tolu, ua tatou manumalo a’ia’i i nei mea uma. Ta tolu mai, ta tolu mai...

FUA TELE I TOE ASO

“²²Auā e pei o aso o le laau aso o lo’u nuu; e uma lava i e ua filifilia e a’u o mea na faia e o latou lima.” Isa.65.

I le tausaga 1968 na maua ai e se saienetisi se asoa ua 600 tausaga le matua i se tuugamau i totonu o Amerika. O lenei asoa na gaosia mai i fatu laau na su’i faatasi. Na ave e le saienetisi se tasi o fatu laau o lenei asoa ma na totōina, ma o se vaaiga maoa’e le mea na tupu – na totogo ma tupu a’e lenei fatu laau. E ui ina 600 tausaga o taatiatia lenei fatu, a e na i ai pea le agavaa e gafatia ai ona tupu ma ola, pe afai e sa’o le nofoaga e tuu i ai.

Atonu ua leva ma tele tausaga talu ona avea oe ma Kerisiano, ma o le tele o lea taimi sa taatiatia faaleagaga aunoa ma se gaoiga tele sa fai. Ma atonu foi ua e lagona lou fia galue, ua fia fua mai ni fua. O le tala fiafia, o loo i ai le avanoa ma le taimi e faataunuu ai, e te le’i tuai. Ma e mafai ona e amata nei loa. *“¹²E tupu olaola le tagata amiotonu e pei o le pama; e tupu tele e pei o le arasi i Lapanona. ¹³O ē ua totōina i le fale o le Alii, e tupu olaola i latou i lotoā o lo tatou Atua. ¹⁴A oo ina ulusinā, latou te fua mai pea lava; e malolosi ma lauolaola i latou; ¹⁵ina ia iloa ai o le Alii e tonu ia; o lo’u papa ia, e lē o ia te ia foi se amio leaga.”*

E te silafia o le laau o le pama na te fua tele mai fua lelei i ona tausaga faai’u? E faapena foi le taunuuga o lou soifua faatuatua. *“²²Auā e pei o aso o le laau aso o lo’u nuu; e uma lava i e ua filifilia e a’u o mea na faia e o latou lima.”* O le uiga o nei afioga a le Atua, e ui ina tutupu mai o patupatu i vae, e ui ina fai matatioata mo vaaiga mamao ma faitauga tusi, e ui ina to’ulu foi lau ma ua tula le ulu, a e avea ou aso mulimuli ma taimi aupito fua tele ma fua lelei faaleagaga. Atonu e umi se taimi e alu i le faiga o se mea o e taumafai i ai, peita’i pe afai e tulei e le atamai o le Upu a le Atua, faatasi ma le tele o tausaga na oulua savavali faatasi ai ma Ia, o le a mafai lava ona e faia se faailoga pe faatu se matati’a mo le Atua i lenei lalolagi. Tau ina e faamalosi, faatuatua ma tatalo pea, ona faia lea e le Atua mea tetele ina ua faateteleina ou aso e soifua ai.

E ‘ASA LOU FAIVA?

“³a e le’i maua se i’a e tasi i lea po.” Ioa.21.

Ina ua ulua’i valaau Iesu i ona soo, na Ia fai atu, *“¹⁹Ina mulimuli mai ia ia te a’u, ou te faia oulua ma fai faiva i tagata.” Mata.4.* Peitai e ui ina sa a’oa’oina i latou ma folafola atu i ai Lona toe tu mai le oti, ma sa matuā vaai tino lava i Lona toe soifua mai, a e sa latou toe foi lava e fai la latou galuega tuai, a e le’i valaauina i latou: o le fagogota. O lenei, e fa’aaogā e le Atua lo tatou poto masani mai o tatou olaga tuai e a’oa’oina ai i tatou, a e na te ta’ita’i i tatou ia aga’i i luma, a e lē o le toe foi i tua. Pe afai e aveale fefe ma le lē mautonu tatou te toe foi ai i tua i le saogalemū o mea tatou te iloa, ona tatou taunuu lea i le mea na oo i ai le au soo: *“e le’i maua se i’a e tasi i lea po.”*

Peitai o le tala fiafia, pe afai sa valaau le Atua ia i tatou, o lona uiga o loo valaauina pea lava. Mulimuli ane ona fai atu lea o Iesu ia te i latou, *“⁵Le fanau e, pe i ai ea ni a outou mea e ‘ai?”* E ui lava i ni o tatou vaivaiga e toilalo ma solomuli ai, a o i tatou lava o fanau a le Atua ua na faaolaina. Ona sosoo ai lea ma Lona poloa’i atu, *“⁶Ina lafo ia le upega i le itu taumatau o le vaa, ona outou maua ai lea.”* Ona latou lafo lea; a ua lē toe mafai e i latou ona toso a’e, ona o taumafa o i’a. ⁷Ona fai atu lea o lona soo ua alofaina e Iesu ia Peteru, *“O le Alii lea!”* O le ā le isi mea na fai? Na Ia talisua faatasi ma i latou i la latou mālū taeao, toe faafou la latou mafutaga, aveese le masalosalo vale i o latou loto, ma avatu i ai le malosi fou latou te o atu e sui atoa le lalolagi uma.

O i ai se a’oa’oga fāua e faamanatu mai mo i tatou e lenei tala masani. Pe afai tatou te galulue i tua atu o le finagalo o le Atua, e faatusa i lo tatou fagogota i le itu agavale o le vai - e alu le malosi tupu le vaivai, a e uma ane e itiiti pe leai se taunuuga lelei. Atonu o lona e i ai ni vaega o le soifuaga o loo e taumafai malosi i ai, mata ua umi foi le taimi ua maumau ai. Toe silasila ane pe o loo sa’o le itu o le vaa o loo e fagota ai! E amata ona fai suiga pe a faalogo, usita’i ma talitonu ia Iesu; e toe faafouina la oulua mafutaga vavalalata ma Ia, ma tatala atu lou agaga e pulea ma faatonutonu e le Alii Toetu manumalo. O loo tele pea le i’a e fia maua, tele le saito fia selesese, a e o loo itiiti le au fagogota i le itu taumatau o le vaa. Ma afai e maua ni i’a, faafoi le viiga i le Tautai Sili.

O LE AGASALA O LE LĒ FAIA

“¹⁷O lenei, o lē ua iloa e fai le mea lelei, a e lē faia, o le agasala lea ia te ia.” Iako.4.

Ua tatou masani e tulimata’i agasala o le komisi – o mea leaga tatou te faia. A e faapefea agasala o le faamisi – o mea lelei tatou te lē faia? I faataoto a Iesu, pe afai e faasalaina se tasi, e masani ona mafua mai le agasala o le faamisi. O se tasi taulealea na tuli ese mai le tausamiga o le faaipoipoga – na fusifusia ona vae ma ona lima ma lafo i fafo i le pouliuli – ona sa le’i ofu o ia i le laei o le tausamaaga (Mata.22:12). E to’a lima taupou na teena mai le faaipoipoga ina ua leai ni suaui i a latou molī (Mata.25:3-11). O le auaua na ia tanu lana taleni i le palapala a e le’i alu e faatau atu, na i’u ina faoa ese le mea sa ia te ia (Mata.25:25-28). O le mau’oa na musu e agalelei atu i lona tuaoi na i’u ina faasalaina ona o lona lē faia o le alofa (Luka 16:19-24). O le laau o le mati sa le’i fua mai na i’u ina fetuuina ma mate ai (Mare.11:20-24).

Atonu e te faapea ane, *“O a’u ou te fiafia i se olaga faaleagaga e loloto atu.”* Ia, o le olaga faaleagaga e sili ona loloto, o le olaga lea e faamaumau i le faiga o mea lelei mo isi tagata. Ma o lona foi le faavae e fua i ai lou faamasinoga, o lou manuia pe leai foi. *“⁴¹Ona fai atu foi lea o ia i e o i lona itu tauagavale, O outou ua faafanoina, o ese atu ia ia te au i le qfi faavavau, ua saunia mo le tiapolo ma ana agelu. ⁴²Auā na ou fia ‘ai, a e tou te le’i avane ni mea ou te ‘ai ai; na ou fia inu, a e tou te le’i avane ni vai ou te inu ai; ⁴³sa fai a’u ma tagata ese, a e le’i talia a’u e outou; na ou lē lavalavā, a e tou te le’i faaofuina a’u; na ou ma’i, na a’u i le fale puipui foi, a e tou te le’i asiasia a’u. ⁴⁴Ona tali mai ai lea o i latou foi ia te ia, e faapea mai, Le Alii e, o anafea na matou iloa ai oe ua fia ai, pe fia inu, po o se tagata ese, pe lē lavalavā, po o ma’i, po o i le fale puipui, ma matou le’i auaua atu ia te oe? ⁴⁵Ona tali atu ai lea o ia ia te i latou, e faapea atu, E moni, ou te fai atu ia te outou, auā na outou lē faia i le tasi o e aupito itiiti o i latou nei, o a’u lea ua outou lē faia i ai.”* Mata.25.

O le mea lea, pe afai e te maua le avanoa e fai ai se mea lelei, ona faia lea! O ai na te iloa, o le avanoa e tasi lona e faamanuia atu ai le Alii i manuia e sautualasi, a o lona o le a e melea?

PEPA MAFUTAGA MATAGALUEGA FALEATA

Faatomuaga:

E fa'atalofa ma fa'afeiloa'i atu i le pa'ia ma le mamalu o le tatou mafutaga i lenei vaega o le aso. Pa'ia i le susū o Tamā o le Matagaluega i a oulua susuga i Toeaina ma oulua Faletua, susuga i Faafeagaiga ma Faletua, afio lau afioga i le nofoatasi o le Matagaluega, lau afioga i le Tiakono Toeaina ma lou faletua, o Tamā ma Tina malolo penisione, tainane le mamalu o le Matagaluega i ona tulaga faalupe. A e o le a aga'i loa se tautalaga i le faamoemoe o lenei aso, ma le Pepa ua saunia. O lenei Pepa ua faaulutalaina:

“O AGA FA'ATUA'OI”

Tusi Faitau, Efeso 4:25. “*O lenei, ia outou tuu ese le pepelo, ia tautalatala faamaoni taitasi ma le la te tuaoi; auā o itu tino lava i tatou o le tasi i le tasi*”

O lenei Pepa ua vaevaeina e faapea:

(a) *Aotelega o le Tusi o Efeso*

(e) *Aga fesootai ia Tasi*

(i) *O Aga faa-Tuaoi- Efeso 4:25*

(o) *A'oa'oga mai le mataupu*

(u) *Upu faaiu.*

(a) Aotelega o le Tusi o Efeso.

E manatu e le o po se lilo i le Tusi lenei a le Aposetolo o Paulo ia Efeso, e ui i le tele o manatu e le o Paulo na tusia lenei tusi. A e o se tusi mo tagata ua fa'a-Talaleleina, aemaise le esesese o le toatele o tagata ua to'a i Efeso ma lona tamaoiga ma ana tu ma 'aga' faatosina. O le uiga o le manatu, o Efeso, o se taulaga e tumu i ai aganuu eseese, o tagata eseese, aemaise tapuaiga eseese. O le isi foi itu, o le lauiloa i le tapuaiga i le latou atua fafine lea e alalaga ma faapea, “Ua silisili Tiana o Efeso” (Galuega 19:34). O se aai lava e tuaoi tagata ua faa-Talaleleina, ma le tele o tu ma 'aga' eseese.

O se tasi la o manulauti o taoto i totonu o le Tusi lenei, o le taumafai lea o le tusitala e alagaina le mealilo (mystery) o le Talalelei, ia Iesu Keriso. O se mealilo o le feagaiga na osi e le Atua ma Aperaaamo (Kenese 12:1-3) e aafia ai ma tagata o nuu ese, lea ua faataunuuina i le afio mai, ma le maliu o Iesu Keriso le Mesia.

I le faagasologa o le Tusi, e lua ni vaega o vaevaeina i ai:

(i) O le Talalelei ia Iesu Keriso (1:1-3:23)

O le alofa tunoa o le Atua e ala ia Iesu Keriso ua tasi ai tagata uma. O le manuia na folafolaina i le feagaiga a le Atua ma Aperaaamo, o lea ua faataunuuina e ala i le soifua mai, maliu ma le toetu manumalo o Iesu Keriso ua toe faatutuina faatasi ai tagata uma. (Efeso 1:10)

(ii) Faataunuuina o le faamoemoe o le Talalelei (4:1-6:24).

O le manatu, o le faataunuuina o le faamoemoe e ala ia Iesu Keriso, ua le ese lea ma le toe foafoaina e le Atua o le lalolagi fou mo le tagata. O lea e ao ona tuuese le tagata tuai, ae avea ma tagata fou ia Iesu Keriso. O se faatonuga e tusa ma le gagana a le tusitala, e tusa o le tulaga o upu o loo faaogaina i le gagana Eleni, o loo aumai o se faatonuga (imperative).

(e) Aga fesootai ia tasi.

E amata le vaega lona lua o le tusi lenei o Efeso e pei ona ta'ua i luga i le mataupu e 4, i le upu 'O lenei'. O le upu Eleni o loo faaogaina 'dio' – 'therefore/for this reason' o se upu o loo sosoo lelei ai vaega o le tusi. O se faamanatu a le tusitala, ua tatau nei loa ona faatino le aveesea o le tagata tuai, a e avea ma tagata fou. O le a lava le olaga sa ola ai, o lenei ua tatau nei loa ona fesootai tagata uma i tu ma aga e faapei ona afio mai ai Iesu i le lalolagi.

O le faalauteleina o lea manatu, o le alofa o le Atua le Tama e ala ia Iesu Keriso, na ia aumaia ai le leleiga e agafesootai ai tagata uma ina ia tasi. O lona uiga, ua leai se pa vaeloto e tusiese ai le tagata Iutaia, ma le tagata ese, a ua faatuina aga e fesootai ai i se siosiomaga e tasi. Ua atagia lea i le manatu o le tusitala o loo faamatalaina ai i se tala faa-faatusa (metaphorically) i le avea lea ma tino e tasi, (eg... 1:22-23) pe faapei o se fale (2:21-22).

O tala faa-faatusa e pei o le 'tino' ma le 'fale' lea o loo leotele, pe feagai ma le gagana a le tusitala i le fuaiupu e 25; “auā o itutino lava i tatou o le tasi i le tasi” (cf4:12,16). O le mea lea, o tu ma aga e tatau ma le au faatuatua uma, ia atagia le alofa tunoa lea o le Atua e ala ia Iesu Keriso, ia manuia ai tagata uma. O loo lima taitaiina foi lenei manatu, i le aioi atu o le tusitala i lana au faitau e faapea; “... *Ia outou savavali ia tusa ma le valaau ua valaauina ai outou...ia outou faapalepale le tasi i le tasi i le alofa. Ia taumafai e outou ona taofi o le lotogatasi i la le Agaga i le noataga o le filemu*” (4:1-3). O le 'tasi' lea, o tagata uma o loo faapea,

“E tasi le tino, e tasi foi le Agaga, . . . Faamoemoe e tasi. . . e tasi le Alii, e tasi le Faatuatuaga, e tasi le Papatisoga; e tasi le Atua, o le Tama foi lea o tagata uma lava” (4:4-6). O le uiga o le manatu, o le gagana lava lea, ‘ua tasi mea uma’, na fatufatu mai lava i le amataga o le tusi i mataupu e tolu muamua, e tusa o le manulauti, ‘O le Atua ma lona alofa tunoa lava na tuufaatasia ai tagata uma ia Iesu’.

(i) O Aga faa-Tuaoi – Efeso 4:25

A o lei oo mai le naunauga o le tusitala i lona leo malosi i le fuaiupu lenei e f25, na ia matua toe faamalosi ma tautino i le au faitau, “*aua tou te toe savavali faapei o nuu faapaupau, o e savavali i le valea o latou loto*” (4:17). Ua matua fautuaina, “to ese le tagata tuai o loo ua leaga. . . . Ma ia oofu outou i le tagata fou ua faia e foliga i le Atua” (4:22,24). O lona uiga, ia aveesea tu ma aga sa masani ai, a ia tasi tagata uma na faia e foliga i le Atua.

O le fuaiupu la e f25, e i ai le talitonuga o loo amata ai e le tusitala faatonuga i tu ma aga e tatau mo tagata Efeso ona tuu ese, ina ia mafai ona ofuina tu ma aga e tatau ma le tagata fou ua i le Atua ma ola ia Iesu Keriso. E fitu lava aga maoti o loo ta’ua e tatau ona tuu ese, e fitu foi aga e tatau ona suia i ai le tagata fou; 1. Tuu ese le pepelo, a ia tautalatala faamaoni (f25) 2. Aua le ita, a ia tauti le filemu (f26) 3. Aua le gaioi, a ia faasoa atu i e matitiva (f28) 4. Aua le faitala, a ia fai le upu e faamalosi (f29) 5. Aua le tau ma sui, a ia faamagalo (f32) 6. Aua le faatiga i le Atua, a ia faautauta (f30) 7. Aua le inu le uaina po le onā, a ia faatumauina i le Agaga (5:18). O aga ia e tuaoi ai le tagata tuai ma le tagata fou. E tusa ma le manatu o le tusitala mo Efeso, e le mafai ona ofu le ofu fou pe a le tuueseina le tagata tuai.

E manatu o le ala lava lea o le amata, o Aga nei i le faamamafa a le fuaiupu e f25, “*ia outou tuuese le pepelo, ia tautalatala faamaoni taitasi ma le la te tuaoi*’. E faamata o se faatonuga e faigofie, auā e ono manatu le toatele ua na o se faatonuga e tatau mo tamaiti. Peitai, a fa’aaauu le faitau fai mai, “auā o itutino lava i tatou o le tasi i le tasi.” Ua uma lava ona faataoto e le tusitala i le matupu 4:4 “*E tasi le tino, e tasi foi le Agaga, faapei ona valaauina outou i le faamoemoe e tasi ua valaauina ai outou*”, o lona uiga e lē mafai ona pepelo le tasi i le tasi. Auā foi e ao ona tautalatala faamaoni i le alofa, ia tutupu i tatou ia te Ia i mea uma, o le ulu lava Ia, o Ia foi o Keriso (4:15).

I le ma lenei, o le upu tuaoi o loo fa’aaogaina i le fuaiupu lava lenei e f25, o loo faasino tonu i tagata ua talia le Talalelei ia Iesu Keriso. O lona uiga, e amata mai i totonu o le lotoifale o tagata ua talia Iesu Keriso e fai ma faaola. O le mea lea e ao ai lava ona tautalatala faamaoni uma lava, ina ia mafai ona tupu le Talalelei ia Iesu Keriso.

(o) A’oa’oga

E manatu o Aga faa-Tuaoi ia o loo tuualalo i ai le tusitala ia Efeso, o se tu foi lea ma se ‘Aga’ faa-Tuaoi taua e faamanatu mo i tatou. O totonu lava o lo tatou lotoifale faa-Ekalesia e amata ai le tuputupu o le Ekalesia. O le mea moni, e le mafai lava ona tuputupu i tatou i le Talalelei, pe a tatou lē tautalatala faamaoni o le tasi i le isi. O le manatu, afai tatou te mautinoa le fa’ao o le Ekalesia ia Iesu Keriso, ona mafai lava lea i le faamoemoe i le Agaga o le Atua, ona tuueseina lo tatou vaivaiga e pepelo ai.

E manatu foi e tele ina tatou faailoga tagata, pe alofa na o isi, ae le fiafia i isi tagata, aemaise lava tagata o tatou aiga, a e ‘eu’eu ese tagata ese. E manatu foi i le tagata e maua ai le mea aogā, ae lē ano i le tagata e lē maua ai se mea. O le uiga o le manatu, ia tutusa tagata uma i la tatou vaai, ma ia tatou tautala faamaoni ona o lo tatou alolofa o le tasi i le isi. O le taufaasese ma le pepelo, o foliga o le leai o se alofa, i le taumafai e faaleaga le isi tagata pe faasesē le mafaufau o le isi i upu pepelo.

E manaomia lo tatou malamalama muamua i le alofa o Iesu, po o le alofa o le Atua na ala mai ia Iesu. O le alofa lea e tupu i totonu ia i tatou e mafua ai ona tautala faamaoni i lou tuaoi. E i ai foi taimi e faapea ai nisi e pepelo ia faatupu ai le filemu, pe ona o le alofa. E lē o se faamaoni lava lea. O le tautala i le upu moni e tusa pe tiga, pe inosia ai tatou. E tautala ona o le alofa i le isi ou uso poo le tuafafine ina ia iloa le mana o le Agaga o le Atua.

O le alofa tunoa o le Atua e ala ia Iesu Keriso, na afio mai ai i le lalolagi ina ia avea i tatou ma tino e tasi ia te Ia. O le maliu ma le toe soifua manumalo o Iesu Keriso, o lo tatou tutū faatasi lava lea ma Ia i le ola fou ua Ia saunia. O Lona malumalu i tatou ua ati a’e ai Lana Ekalesia. Ua avea i tatou ma tino e tasi ua fa’ao ia te Ia. O le mea lea, o lo tatou fesootai faa-tuaoi ia tasi e tāua. O le fetausia’i ma le faamoemoe i le Agaga Paia o le Atua e mafai ai le leleiga i aga faa-tuaoi e fesoota’i ai, ma tupu i le Tala Lelei ia Iesu Keriso. Ia soifua ma ia manuia.

*Saunia susuga Kereveta Tiimalu AM
EFKS Vaitele-uta, FALEATA.*

O E UA FAI I LAGI FOLAUGA

NIULALA FAASINA KUPA FS

(20 ME 1956 - 17 IUNI 2022: 66 tausaga + 29 aso)

Na soifua mai le Susuga Niulala Kupa i ona matua o Rev. Euta ma Fiapapalagi Nanai Kupa, i le Aso Sa, 20 Me 1956 i Papa Puleia sa galulue ai ona matua. Na faaipopo atu ia Loreta Saliga Posenai i le Aso Toonai 8 Aokuso 1980. O ia o se Faia'oga Samoa Faauuina, a o le'i ulufale atu i Malua. E to'a fitu o la'ua alo, ma fanau a fanau e 14. O le tausaga 1984 na la'ua ulufale ai i le Kolisi Faafaifeau i Malua, ma faai'uina ai ma le manuia lo la'ua taumafai i le tausaga 1987.

O le Aso Tofi, 11 Fepuari 1988 na osi feagaiga ai ma le EFKS Tafua-tai seia oo ina valaau lona Matai ia te ia. O le tausaga 1990 na filifilia ai e fai ma Failautusi o le Pulega Palauli, seia oo ina tuumālō. O Niulala o le sui a le Matagaluega Faasaleleaga i le Komiti o Atina'e, ma tofia ai e ave ma Taitaifono a le Komiti Atina'e i le 2000 se'ia oo ina maliu. O ia o le sui o le Komiti Atina'e i le Komiti Tupe, ma le Komiti Laititi mo Galuega a le KFE.

Na tuumalo le Susuga Niulala Kupa a o saili togafiti i Niu Sila i le Aso Faraile, 17 Iuni 2022. O le aso 14 Iulai 2022 na taunuu mai ai i Samoa lona tino maliu, o le tatalo i Faleolo na saunia e Pouniu Faamausili FT, a o le uafu i Salelologa o Mose Tanielu FS. Na momoli atu i le Maota Maliu o Letoa Sefo Pa'u i Safotulafai Savaii, ona sosoo ai lea ma le sauniga i le malumalu EFKS Tafua-tai, na taitaiina lava e le Toeaina, Susuga Leaso Tupa'i FT i lea lava afiafi. O le Aso Sa 17 Iulai 2022 na latou fai tapuaiga faatasi ai ma lana Aulotu i Tafua-tai, i le sauniga na ta'ita'i e le Susuga Pouniu Faamausili FT (o ia na momoli mai le sa o le faifeau mai Niu Sila). Na toe malolo atu le Susuga Niulala i le Maota Faasausau o Sefo Pa'u. O le Aso Tofi, 21 Iulai i le itula 1.30 i le afiafi, na faimalaga atu ai le sa o le auauna a le Atua mo lona nuu i Tafua-tai, sa tofa ai a o feagai le Pulega ma Leoleoga faamafanafana o lea po.

O ona Toe Sauniga na faia i le aso na sosoo ai, Aso Faraile 22 Iulai, itula e 7.00 i le taeao i le Malumalu o le EFKS Tafua-tai na ia fausia ma galue ai. Na ta'ita'i le Susuga Leaso Tupa'i KMTA, faaulufale le sa e Ioane Viliamu Samoa FT, faitau le Tusi Paia e Fiafia Toleafoa FT, tatalo le Susuga Faasavala Leilua FT, a o le afioga Taitaifono Fono Tele, Susuga Iosefa Atapana Uilelea FT na saunia le Lauga/Upu faamafanafana. Na molimau le faletua ia Loreta

Kupa, Auva Magele Leituala Samasoni Kupa (o le uso, fai ma sui o le aiga), Naitosara Kupa-Tevaga (le ulumatua o le fanau, faletua Faifeau Samoa), sui o le Aulotu, Failautusi Pulega ma le Matagaluega. O le tamā alofa, auauna lelei ma le faamaoni, mo Iesu Keriso ma le tausiga o Lana lafu mamoe. Na mae'a ona Toe Sauniga, ona tuuvaa lea mo Tumuā i le 2.00pm e lagomau ai i lona aiga i Tulaele Faleata, ma faatofa atu ai, "*Talofa uso e, Tofaina oe.*".

E moni ai upu o le tagi a Tavita ina ua maliu le tupu o Saulo, "*E, ua maliliu toa, ua maumau ai auupega o le taua.*" Ia faamafanafanaina le Faletua loto faanoanoa ia Loreta Kupa, le fanau, le paia i aiga na lua, aemaise le Ekalesia i Tafua-tai. Ia manuia lau malaga uso. Soifua.

*Saunia susuga Mose Tanielu FS
Failautusi Pulega Palauli
FAASALELEAGA*

Lo Matou Tamā


Na ave e le Atua le malosi o le mauga maualuga,
Faapea le laulauā ofofogia o le tupu o le laau.
Le mafanafana o le pa'i mai o le susulu o le la,
Ma le malū o le gataifale, le sami ma ona peau.

Le matagofie foliga felanua'i eseese o le natura,
Ma le aao faamafanafana o le pogisā.
Le malosi o le felelea'i a le manulele o le aeto,
Ma le atamai o le soifua ua āu tupulagā.

Le fiafia o le taeao fou, i lona sau mālū,
Ma le faatuatua i totonu o le fatu o le sinapi.
Le onosa'i o le olaga se'ia ausia le faavavau,
Ma le loloto o mana'oga faalotoifale fetausia'i.

Na tuufaatasi e le Atua nei uiga lelei uma,
E mamanu ai se palealii e atoatoa ma anagatā.
Ua leai se isi mea na toe e fia faaopopo,
Ua silasila ua lelei, ona Ia faaigoa lea, o 'tamā'.

*Ia manuia lau malaga, Tamā Niulala Kupa,
Se! Ua malie toa, ua malo molimau faamaoni.
Lau tautua matavela, fai ma viiga o le Atua,
O faatali mai le Lagi le olioli o lou tau.*



NIULALA KUPA FS



MAA FAAMANATU, FALE LOMITUSI



Matalena P. Vili, Susana T. Iosia, Teki I. Uilelea ma nisi valaaulia i le EFKS Salelologa



Tesimeta Afamasaga FT, Valaauina Taumua FS ma nisi i le Maa o Faifeau, Salelologa.



Tiafaafo FS & Tracy Gatoloai (Faafeagaiga EFKS Tulaele) & Kirisimasi Sani FS